

2457

iii

par Mathieu de  
Morgues

# MANIFESTE,

OV RAISONS DE LA  
Royne, mere du Roy.

M. DC. XX.

Case

F

39

326

1620mc

THE NEWBERRY  
LIBRARY

---

MANIFESTE,  
OV RAISONS DE LA  
*Royne, mere du Roy.*

**L**A Royne se plaint grandement de ce qu'e-  
stant nee Princeſſe d'une des grandes mai-  
ſons de l'Europe, & apres avoir eu l'honneur  
d'eſtre eſpouſe d'un des grands Roys qui aye ia-  
mais regné en France, & mere du Roy regnant  
aujourdhuy, & apres avoir gouverné avec tant  
de perils & de ſoin durant la majorité du Roy  
ſon fils ce Royaume, ſque pour recompenſe  
de tant de labeurs & affections maternelles elle  
ait eſté honteuſement chassée de la Cour, de la  
preſence du Roy ſon fils, & de ſes autres enfans,  
pour eſtre releguée comme priſonniere dans  
Blois, avec toutes ſortes d'indignitez, contre le  
reſpect deu à ſa naiſſance, & à tant de grands  
Princes à qui elle a l'honneur d'appartenir, &  
contre l'honneur qui eſtoit deu au deffunct Roy  
& de celui du Roy ſon fils; le tout par l'aduiſ &  
conſeil de de Luynes, ſes freres & ſes adherans,  
pour pouvoir plus facilemēt durant le bas aage  
du Roy ſon fils, uſurper l'autorité Royale par  
le maniement de l'Eſtat.

Et pource la Royne s'eſt plainte que les ſuf-  
nommez abuſans de la ieuneſſe & faueur du



Roy, ont tellement continué leurs mauuais des-  
seins, que non contens de la priuer de la veuë du  
Roy son fils & de ses autres enfans, qui est la  
crainte la plus barbare qui se pourroit excogiter  
contre la plus indigne & plus vile personne du  
monde; ils ont fait oster d'aupres elle ses meil-  
leurs & plus fidelles domestiques, fait prisoniers  
sans occasion plusieurs autres, sans raison ne iu-  
stice, contre les pratiques ordinaires de ce Roy-  
aume.

Faiçt deffendre à toutes sortes de personnes  
de la voir, ny de la frequenter, comme si elle eust  
esté criminelle de leze Majesté. Faiçt faire com-  
mandement de ne se pourmener plus loing d'v-  
ne lieuë de la ville de Blois.

Faiçt donner le sieur de Royssi pour espier &  
veiller ses actions, suborner les siens pour la tra-  
hir, enuoyer sous ombre de messager les vns  
apres les autres depuis 22. mois en ça avec mille  
fausses promesses de la faire reuenir au gré de sa  
Majesté pour luy faire croistre le nombre de ses  
afflictions.

Marier Madame sa fille à vn Prince estrange  
sans y auoir esté appelée, à fin que sa honte soit  
manifestee à tous les Roys & Princes de la Chre-  
stienté, & à toute la France.

Dequoy ayant esté fidellement aduertie, &  
l'vn de ceux à qui ils se confioient de leurs plus  
particuliers secrets, elle auroit esté contrainte de  
sortir de nuict pour se retirer vers monsieur le  
Duc d'Espemon, pour luy donner seure retraite  
dans la ville d'Angoulesme, pour là estant en

seureté de ses ennemis, pouuoir avec plus de liberté faire entendre à sa Majesté les outrages & inhumains traitemens qu'elle a receus des susdits nommez, & luy donner aduis des desordres que telles gens causent dans son Royaume, & les moyens pour y apporter remede.

Et pour commencer leurs mauuais deportemens seroit à considerer quels artifices, pratiques & ruses ils ont exercees, pour violenter le Parlement à donner l'arrest de mort contre la Mareschalle d'Ancre par fausses accusations, à fin d'en auoir la despoüille, de laquelle se voyãs asseurez auroient encores pour se rendre absolus conseillé le Roy de retenir Monsieur le Prince de Condé prisonnier avec Madame sa femme, à laquelle les ennuys de sa captiuité, ont fait perir trois enfans: duquel emprisonnement la Royne confesse veritablement & atteste deuant Dieu n'auoir vn plus grand regret au monde que le mauuais Conseil & faux donné à entendre, elle en ayt esté induite ayant reconnu depuis la verité de son innocence, de laquelle elle peut asseurer le Roy.

Et est encores à noter les perfides trahisons & artifices dont ils se sont seruis pour arracher des mains du Mareschal de Vitry & du sieur de Persan son beau-frere, la personne dudit Prince pour l'auoir entre leurs mains, & quelle hardiesse ils ont eüe encore de faire vn regiment nouveau pour auoir la force & la puissance des armes entre leurs mains.

A quoy il faut adiouster la presumption &



audace qu'ils ont eu d'auoir voulu gescner & reduire la Princesse d'Orange à telle extremité, que pour liberer ledit sieur Prince son frere d'espouser Cadenet, à fin que par le moyen d'une telle obligation & alliance ils peussent le conseruer sous la protection d'icelle, au grand preiudice & dommage du Roy, leur pouuoir & auctorité.

De plus pour pouuoir monstrer leurs pernicious desseins tous euidens, chacun voit qu'ils ont chassé d'aupres monsieur frere du Roy, pour le pouuoir disposer à leur fantasie, le sieur de Breue, persónage choisy pour ses merites, & qui s'aquitoit dignement de ceste charge, pour le mettre entre les mains d'un de leurs confidens, dont il a esté autrefois tres-heureux d'estre domestique.

Monsieur le Conte de Soissons n'a pas esté exempt d'estre obserué, & n'ont pas manqué de faire veiller son Gouverneur par personnes qui le frequentoient & ses actions.

Quant aux autres Princes, Ducs, Pairs & officiers de la Couronne & seigneurs du Royaume, ils ont esté entierement priuez de la cognoissance & gouvernement des affaires, pour en donner l'entier maniemment à Modene, Deagent, Colonnell d'Ornane, & Marcillac, personnes du tout indignes & incapables de telle charge.

Les traitemens que l'on a faict à monsieur le Duc d'Espernon, apres si longs & fidelles seruices rendus à ceste Couronne, en rendent tesmoignage, leur insolence ayant esté iusques là

7  
que le vouloir faire prisonnier du Roy; & du  
depuis l'ayant fait retenir à Mets sous pretexte  
des affaires imaginaires de Bayonne, à fin de n'a-  
voir aucun contredit, & pour faire les fonctions  
de sa charge de Colonel de l'Infanterie. A quoy il  
faut adiouster les persecutions que l'on a fait  
souffrir à cest occasion à monsieur le Marechal  
de Roquelaure, au sieur de Tilladet, & à la da-  
moiselle du Tillet.

Pour Monsieur le Marechal de Bouillon, le  
grand mespris que l'on a fait de sa qualité & pou-  
voir, le traitant avec toute sorte d'indifferends  
fait assez voir qu'ils veulent faire perdre au Roy  
l'affection des plus graues personnages de ce  
Royaume qui ne le peuuent pas dignement ser-  
uir.

Monsieur le Duc de Montmorency a aussi  
experimenté leur impudence par les affronts  
qu'ils ont fait à Madame la Connestable sa belle  
mere, l'ayant ostee d'aupres la personne de la  
Royne pour complacer Madame de Luynes &  
leurs sœurs à fin que personne n'approche de sa  
Majesté, que par leur moyen, ledit Seigneur de  
Montmorency, qui exerçant sa charge en son  
gouuernement a receu toute sorte de mescon-  
tentement par les mauuais offices qu'ils luy ont  
rendu aupres du Roy.

L'on sçait les grandes perfidies qu'ils ont vſé  
vers Monsieur le Grand, pour les affaires de  
Monsieur d'Espernon, & du Marechal de Vitry,  
& comme en la grãde maladie en la ville de Paris  
dés l'annee passée croyant qu'il deu tmourir, ils



en auroient obtenu les charges, frustrans par ce moyen les merites & les seruices du Baron de Termes son frere.

Pour toutes les charges qui ont vaqué durant le temps de leur faueur, depuis la plus grande iusques à la plus petite charge, nulle n'a eschapé qu'ils n'ayēt retenues pour eux, vendüe ou donnée à ceux de leur cabale, & n'abayent encores tous les iours que la mort de ceux qui ont les bonnes & grandes charges pour en auoir la despouille à la ruine & dommage de ceux qui par leur vertu & seruice pourroient iustement en estre recompensez.

Quant aux finances, ils en ont disposé & disposent effrontement à leur volonté sans aucun contredit, & les ont tellement espuisees que le Roy & son Estat en sont grandement endommagés.

Pour ce qui est de la forme & dignité royale à distribuer l'ordre en toute chose & à departir ses biens faits & les audiences enuers ceux qui en font la fonction, faisant les Roys proposans & resoluans aux plus grandes affaires sans y appeler que ceux qui bon leur semble, donnant les audiences mesme en plein Conseil aux plus grands de l'Estat, se reserrans parapres dans leur Chambre où ils font que chacun attende la definition de leurs volonteiz sur toutes sortes d'occurences. Pour à quoy paruenir les difficultez de les approcher & de leur parler font perdre le courage à quantité de gens de bien de se tenir pres du Roy.

Et



Et ce qui est deplorable, est que tandis qu'ils font ainsi leurs affaires aux despens de la France, ils font amuser le Roy par des boufons & gens de neant à des ieux & exercices d'enfant, chose indigne de l'aage d'un si grand Roy, duquel les actions doiuent seruir d'exemple à tous ses sujets.

L'assemblée des Notables faicte à Rouen sous le faux pretexte de donner contentement à la France, sur les demandes proposées aux Estats generaux, si nécessaires à estre exécutées, pour rompre seulement la Paulette, à la ruine de toutes les affaires de la France, tout au contraire des intentions & moyens qui auoient esté demandez en l'assemblée des Notables, à fin qu'eux puissent disposer des affaires qui viendront à vaquer, tant pour en tirer de grands deniers que par le moyen d'acquérir des creatures par toutes les meilleures villes de ce Royaume, qui est vne preuue manifeste, qu'ils preferoient leur bien particulier à celuy del'Estat & vtilité publique.

Depuis ce temps, le nombre d'imposts & leuee de deniers extraordinaire ont esté imposez sur le peuple, qui est du tout accablé. A quoy la Royne mere supplie sa Majesté de vouloir donner ordre, comme aussi empescher la Cour des tyrannies & vexations des officiers, Capitaines & Archers des gabelles, qu'ils exercent iournellement sur tous ses sujets, particulièrement sur ceux du Clergé & de la Noblesse, chose qui n'auoit iamais esté exercée du temps du deffunct

Roy, ny de la regence de la Roynne; ains depuis que ceux-cy participans avec les partisans ont donné impunité à toutes ces pilleries, confusions & assassins.

La reuente des Greffes faite si mal à propos contre le proiet du defunct Roy, où sa Majesté a esté volée de plus de six millions de liures, pour enrichir les susnommez aux despens des biens de la Couronne, avec les pensions & impôts de vin, le tout sur tous les partis & fermes de ce Royaume, fût assez voir les tresors qu'ils accumulent pour se rendre redoutables à l'Estat, & en pouuoir chasser par le moyen de ceste puissance ceux qui voudroient s'opposer à leur tyrannie.

En suite de tout ce que dessus, ils se sont rendus maistres avec l'alliâce du sieur Duc de Montbazon, & de la Citadelle d'Amiens, la Fere, Soissons, Coucy, Chauny & du gouuernement de l'Isle de France, & installé le Colonel d'Ornano dans le Pont de l'Arche, Vernueil au Perche, avec la Lieutenance de Normandie, pour ioindre plus facilement Quillebœuf, à fin de tenir Paris & Rouen en suietion.

Non contents d'auoir le Chasteau d'Amboise & Nantes sur la riuere de Loire, ont encores depuis peu de temps voulu estre recompensez du gouuernement de Bretagne, Lieutenance de Roy à Blauet, Courāneau avec Fugeres que tiēt ja Modene à fin de ioindre tous ses pernicieux, & sous leur autorité s'establi si puïssamment que quand mesme le Roy les voudroit abaisser,



voyant leur trop grande puissance & dangereuse à vn Estat, n'en peut venir à bout; & quand par fortune il viendroit de faillir, ce qu'à Dieu ne plaist, ils puissent partager ce Royaume avec ses successeurs. Chacun sçait aussi les efforts qu'ils ont fait pour auoir si peu qu'il reste d'autorité en Picardie à Monsieur de Longueuille, n'ayans obstacle que celuy là pour empescher d'auoir le reste de la place de ceste Prouince.

Leur folie & ignorance a esté en son premier degré, en s'esbranlant contre le corps de la Religion pretendue, pour innouation des affaires de Bearn, & par le manquement des obseruations de traités de paix faites avec eux par les Roys predecesseurs, sans considerer le commencement & preuoir les perils que les manquemens peuvent apporter en ce Royaume.

Quant aux affaires de dehors, c'est vne chose estrange que tous les Ambassadeurs & Princes de la Chrestienté ayent à faire leurs propositions & prendre leurs resolutions de personnes si impertinentes, & de si basse condition, & que la cognoissance en soit ostee aux principaux officiers de la Couronne, & principaux de l'Estat.

C'est de là que la bonne intelligence & étroite amitié, qui dès long temps auoit esté contractee avec la Couronne d'Angleterre & celle de France, a esté si mal recogneuë & traitée avec tant d'inesperance comme si nous n'en auions le soing.

Ils n'ont pas moins porté d'enuie à Messieurs les Estats de Hollande faisans pren-

dre au Roy la cause en main de Bernauel & des trahisons enuers sa partie, qui ne peuuent iamais estre esreueues des Chrestiens & bon François.

Les menees faites pour pratiquer le gouuerneur d'Orange, pour le soustraire de l'obeyssance qu'il doit à son maistre & a son seigneur, n'ont pas moins touché le courage de ce grand Capitaine dont la vertu & l'affection qu'il a tousiours eüe à la France, ne merite point estre traitée de la sorte contre le droit des gens.

En fin chacun peut iuger quelles miseres, desolations, rigueurs, calamitez, personnes de si basse condition, desnuez de toute experience, capacité & probité, peuuent apporter au manieement d'un si grand Royaume, quelle honte c'est à la France de souffrir vn tel infame, auquel desordre & abus, la Roynie mere ayant vn tres-grand & notable interest qu'il soit remedié promptement, tant pour l'extreme affection qu'elle porte au Roy comme mere, & à son Estat, qu'aussi pour les grands inconueniens qui en peuuent arriner, supplie tres-humblement sa Majesté de vouloir chasser d'aupres elle telles personnes indignes & incapables, contre l'insolente rapine desque s toute la France doit crier vengeance, & remettre tous les Princes du sang, Pairs & Officiers de la Couronne, Seigneurs, Gentils hommes, en la libre fonction de leur charge & dignitez & s'approcher près de sa personne, pour bien seruir son Estat, & qu'elle puisse estre en sorte près sa Majesté, comme enfant, & qu'elle n'aye point ce des-



plaisir que des personnes qui l'ont si mal traitée  
soient iniustement maintenus contre tant de  
bonnes affections qu'elle luy porte & à son  
Royaume ce qu'elle espere de sa bonne inclina-  
tion qu'il vueille esgaler l'amitié des vallets à  
celle qu'il doit à celle qui a l'honneur de l'auoir  
mis au monde.

Sinon elle proteste d'employer tous ceux à  
qui elle a l'honneur d'appartenir, sa vie & ceux  
qui honorent la memoire du deffunct Roy, contre  
les susnommez, pour en auoir raison & iusti-  
ce, protestation qu'elle fait deuant Dieu, & de-  
uant les hommes, de n'auoir aucun ressentiment  
contre sa Majesté, qu'elle tient innocente de  
tous les sensibles desplaisirs que l'on luy a fait  
receuoir, ains seulement contre ceux qui en sont  
la cause, & de tous les malheurs qu'on luy a fait  
souffrir à leur occasion, n'ayant autre but & in-  
tention que la grandeur & prosperité de la Ma-  
jesté & de son Royaume.







